

Drags, pirats ed in cameleon

Finamira da siu project seigi da svegliar il plascher ed interess pil lungatg romontsch, motivescha Riccarda Camenisch. Quels gis presenta la Surselva Romontscha siu cudisch d'affons cul tetel «Camillo». La mussadra creativa da Laax ha inventau, scret ils texts ed illustrau la figura dil cameleon che va alla tscherca da sia atgna musica.



Riccarda Camenisch ha scret, illustrau e cumponiu il cuntegn. FOTO AUGUSTIN BEELI

AUGUSTIN BEELI/FMR

All'entschatta digl onn ha ella presentau il project e la figura, ed ussa ei il product sin meisa: Camillo, il cameleon. Vendergis vegn l'editura, la Surselva Romontscha, a presentar il cudisch da Riccarda Camenisch. Ella ei carschida si a Laax ed instruescha dapi biars onns alla scoletta. Sco quei ch'ella ha getg en in discuors culla FMR muncavi ad ella adina canzuns actualas e tenor temas e stagiuns. Aschia hagi ella produciu sezza quei che muncava e gl'arcun persunal da canzuns seigi s'emplenius.

Surselva Romontscha ei editura
Cuntinuadamein hagian ins intimaue la d'edir in cudisch cul material. Producir in cudisch ei cumbinaus cun gronds cuosts e rescas finanzialas. Cu la mussa-

dra ha inoltrau alla Surselva Romontscha – nunligiontamein – il project da Camillo ha ella udiu gitg nuot. Lu ha l'organisaziun denton decidiu da realisar, ensem cun *Riccarda Camenisch* ed il producent da musica *Manfred Zazzi*, in cudisch cun 14 canzuns. Il fevrer 2025 ha Riccarda Camenisch presentau siu project alla radunonza generala dalla Surselva Romontscha.
Sin 80 paginas san ins ussa mirar e tedlar l'aventura dil cameleon Camillo. Tedlar las canzuns san ins cun agid d'in code QR. Cul telefonin fed in amplificatur mobil ei l'applicaziun fetg sempla ed accessibla a carschi ed affons.

La vernissascha da «Camillo» ei vendergis, ils 12 da december 2025, allas 18.00, a Laax, ell'aula dalla scola.

«Igl ei in cudisch multisensoric»

La Surselva Romontscha presenta quels gis il cudisch d'affons «Camillo» da Riccarda Camenisch. La mussadra da Laax ha scaffiu in'ovra plein color e veta, el center ei la figura principala, il cameleon Camillo. Riccarda Camenisch ha fatg las illustraziuns, scret ils texts e cumponiu las 14 canzuns.

«Camillo – il cameleon el mund magic dallas canzuns» ei il tetel dil cudisch. Riccarda Camenisch raquenta la historia digl animal dalla dschungla che stat bugen a sulegl sin siu rom preferiu. El siemia da loghens jasters e nunconuschents. Il cudisch ei nunconvenzional ed innovativ. La FMR ha discurriu cull'autura.

Il product che Vos haveis presentau il schaner 2025 alla radunonza generala dalla Surselva Romontscha ei ussa sin meisa. Tgei scheis Vos dil resultat final?

Riccarda Camenisch: Jeu sun fetg cuntenta. Igl ei dapli ch'in cudisch cun ina cuviarta ed 80 paginas cuntegn. Cun realisar quei project hai jeu astgau far ina massa experientschas e crescher fetg persunalmein. Jeu hai plascher ch'il process ei culaus aschi lev, tgunsch e positiv. Miu pli grond plascher ei ch'jeu astgel schenghegiar ina massa canzuns als affons.

Ei gliez la finamira principala dil project «Camillo»?


Miu intent eis ei da schenghegiar als affons las canzuns ed il plascher da cantar. Buca mo ad els, era a carschi. Semplamein tut tgi che ha plascher e ch'ei aviarts per munds ed emoziuns.

Era ils carschi plidenteis Vos, eis ei buca mo in cudisch d'affons?

Bein, en emprema lingia eis ei naturalmein in cudisch per affons. Jeu hai era creau las canzuns per mia lavur en scoletta. Jeu tratgel ch'il cudisch vegni a plidentar era carschi ch'ei aviarts da far in viadi sco quei che Camillo fa. El fa in viadi alla tscherca da siu ver esser, sia glisch interna, ni sia atgna identitad.

Da siu exterior se presenta il cudisch cun in bi frontispezi. Saveis explicar zatgei special dil cuntegn?

En quella fuorma dat ei el territori romontsch aunc negin cudisch per affons. La historia dil cameleon Camillo ei concepida tut auter ch'in cudisch convenziunal. Igl ei in cudisch multi-



sensoric. Quei munta ch'il lectur vegn plidentaus sur plirs canals. Inagada eis ei las illustraziuns che plidentan gl'egl. Lu denton era las historias ch'ins sa tedlar ni leger. Lu cuntegn el 14 canzuns ch'ins sa gest tedlar e che han connex culs maletgs. Aschia vegn era gl'aspect emoziunal plidentaus a tgi che astga tener enta maun il cudisch. Cun tut quels mieds dat ei la pusseivladad da s'approfundir e far patratgs.

Sch'ins teidla las canzuns, aud'ins vuschs enconuschentas, per exempel Chiara Jacomet e Gino Carigiet. Co ei quella cooperaziun sedada?

Gl'emprem stoi jeu puntuar ch'igl ei stau ina grondiusa cooperaziun cul producent da musica *Manfred Zazzi*. En siu studio a Turitg havein nus registrau la musica. Sper *Chiara Jacomet*, *Gino Carigiet*, *Lucas Schwarz* ed jeu ha era *Dario Hess* dau la vusch per las canzuns da Camillo. Jeu mezza hai cumponiu e scret tut ed els, sco musicists romontschs, ein stai prompts da cooperar. Mintgin ha survegnu las canzuns ch'ei s'accordadas culla persunalitad. Dario Hess per exempel ei s'identificaus nunterg culla canzun dils pirats ed ha saviu transponer quella sco ei s'auda. Contribuiu musicalmein el studio ha dil reminent era il musicist *Rolf Caflisch*.

Il territori romontsch associesch'ins cun in capricorn, ina muntaniala ni in auter animal dallas muntognas. Daco haveis tscharniu il cameleon?

Jeu hai elegiu il cameleon sapientivamein sco figura empalonta dalla historia. Las canzuns tractan differentas tematicas, differents munds, colors ed emoziuns. Ellas ein era fetg variontas. Il cameleon ei quei animal che sa propi midar color ed ir senza difficultads en differents munds e scenas. Perquei eis el la figura ideala per colligiar tut las differentas canzuns e far ordlunder enzatgei homogen.

Il product ei sin meisa. Co s'imagineis Vos ch'il cudisch cun siu cuntegn innovativ ed attractiv anfli la via en scolettas, famiglias e casas romontschas?



Buc in capricorn ni ina muntaniala – in cameleon ei il protagonist dil cudisch cun canzuns per affons da Riccarda Camenisch. FOTOS MAD

Dus novs lufs-tscherver

La mesjamna vargada eis ei – ell'ura da damonda duront la sessiun da december dil Cussegl grond – vegniu tractau il remplazzament dils lufs-tscherver ch'ei vegni sittai ils 16 da november 2024 per sbagl ella Surselva. La finamira ei da remplazzar quels cun lufs-tscherver dalla Rumenia ni dalla Slovachia.

MANUEL PELICAN/FMR

Ils 16 da november 2024 ha in guardiaselvaschina sittau per sbagl treis lufs-tscherver enstagl da sittar lufs dil triep dil Vorab duront in'acziun da notg. Suentier quell'acziun disgraziada ha il cantun Grischun communicau ch'el vegni a mirar cun igl Uffeci federal d'ambient (UFAM) sch'ils donnas alla populaziun dils lufs-tscherver sappien vegnir cumpensai. Quei cun introducir semegliont biars lufs-tscherver da populaziuns ch'ei buca pertuccai d'incest ella Surselva.

Anita Mazzetta s'interessescha
Il meinagestiu dil WWF Grischun e deputada verda *Anita Mazzetta* ha tschentau mesjamna treis damondas en il Cussegl grond durant l'ura da damondas. Ella ha per ina dumandau davart il stan ac-

tual da quei remplazzament e cun tgei tiaras ch'il Cantun ed igl UFAM seigien en contact per survegnir novs lufs-tscherver. Per l'autra voleva ella saver, cura ch'ins savess spitgar quei remplazzament.

Carmelia Maissen dat sclariment
La cussegliera guvernativa *Carmelia Maissen* ha declarau la situaziun actuala da quell'acziun per remplazzar ils lufs-tscherver. Tenor las directivas dil dretg federal stoppi ei vegnir garantiu tier ina recolonisaziun che l'atgnadad genetica dalla populaziun, en quei cass dils lufs-tscherver, resti mantenida e protegida. Per ch'il genom seigi aschi semeglionts sco pusseivel als anteriurs lufs-tscherver, seigien prioritarmein adattai animals dalla Rumenia e dalla Slovachia e schiglioc animals ord in program da tratga.



Ils lufs-tscherver sittai per sbagl ella Surselva vegnan remplazzai cun in dil Giura ed in dalla Rumenia ni dalla Slovachia. FOTO KLAUS ROBIN/SOMEDIA

Ils 4 d'uost 2025 hagi igl Uffeci da catscha e pesca (UCP) dumandau igl UFAM per schar liber dus lufs-tscherver ella Surselva. Quella damonda seigi vegnida approbada ils 25 da november 2025. La lubientscha da plazzar dus novs lufs-tscherver en Surselva vala tochen igl onn 2030.

Sco emprem in dil Giura
Cunquei che la damonda per lufs-tscherver dalla Rumenia e dalla Slovachia ei fetg gronda, seigi ei da spitgar fin l'entschatta digl onn 2028 cun in plazament d'in tal animal ella Surselva. Perquei seigi ei vegniu decidiu da pigliar en in emprem pass in saun luf-tscherver dalla regiun dil Giura. E lura, en in secund pass, da pigliar in dalla Rumenia ni dalla Slovachia.